

www.BibleForChildren.org

San Mateo 8



Quinsa caj p'unchaypi Galilea jallp'a Canapi uj
casamiento carka. Chaypitaj Jesuspa maman
casharka. Jesuspis yachacojcunanwan chay
casamientoman wajyariskas carkancu.



Vino tucucapojtintaj maman Jesusta nin: —Manaña
vinoncu canñachu, —nispa. Mamanri yanapajcunaman
nin: —Imatachus nisonkachej chayta ruwaychej,
—nispa.



Jesustaj paycunata nin: —Chay
p'uñusman yacuta junt'achiychej, —nispa.
Wasarishajta junt'acherkancu. Jesustaj
paycunata nin: —Cunan wiserkospa
apaychej dispenseroman, —nispa.
Paycunataj aparkancu.



Dispenseroka yacumanta ruwaska vinota mallerka.
Payri mana yacharkachu maymantachus caskanta.
Yacu wisej yanapajcunalla
yacharkancu.



Chaymanta dispenseroka casaracojta wajyaspa
nin: —Tucuy runamin ñaupajta sumaj caj vinota
runasman jaywan. Runas
sajsajtincutaj khepata
lak'allataña jaywan.
Kanrí cay sumaj
vinota cunancama
wakaychaskanqui,
—nispa.



Cay ricuchinaspa kallariyninta Jesús ruwarka Galileapi
caj Caná llajtapi. Chayta ruwaspa
atiyninta runasman
ricucherka.


Yachacojcunantaj paypi
jap'icorkancu.



Khepanta Jesús Pedroj wasinman
rispa Pedroj warminpa mamanta
ricorka. Pay sinch'i k'oñi onkoywan
camapi siricusharka.



Jesustaj onkoskaj maquina llangharispa k'oñi onkoyninmanta thañicherka. Thañiska warmitaj jataricuspa miqhunata payman jaywarka.




Ch' isiyaycuyta inti yaycuskanmantaña runaska tucuy
onkoyniyojcunatawan supayniyojcunatawan Jesusman
pusamorkancu. Chay
llajta runastaj
tucuy nincu wasi
puncuman
tantacamorkancu.



Ashqha onkoska runasta tucuy laya ñac'arichiskasta
Jesuska thañicherka. Ashqha runasmantataj
supaycunata kharkorka. Supaycunari payta
rejserkancu. Chayraycu Jesuska mana parlarejta
sakerkachu.



Tucuy runastaj Jesusta llanqhariyta munasharkancu
atiyninwan tucuyta thañichiskanraycu.



Chaypachitataj tawa runas riqhurimorkancu uj mana
cuyurej runata Jesusman wantumuspa.



Chay ashqha runas chaypi
cashaskancuraycutaj Jesusman
chimpaycuchiyta mana aterkancuchu.
Chayraycu tejasta orkhorkancu
wasi patapi uj jusc'uta
ruwanancupaj Jesús
casharka chay
chekanpi.



Chay jusc' unejtataj mana
cuyurej runata callapunpi
wantuspa Jesuspa
ñaupakenman
uraycucherkanco.



Jesuska cayta rikuspa repararka paycuna tucuy
sonkowan creeskancuta
onkoskata pay
thañichinanta. Chayraycu
runaman nerka:

—Wawáy,
juchasniyqui
kanmanta
khechuskaña,
—nispa.

Kanta niyqui:
Jataricuy,
callapuyquita
okharispa ripuy
wasiyquiman, —nispa.



Chaymanta Jesuska barcoman yaycorka,
kocha chimpaman rinancupaj.
Yachacojcunan paywan
risharkancu. Ujllata jatun
kochapi manchay sinch'i
wayrawan yacoka mayta
okharicorka.




Yacoka callpawan khallacamuspa barcota
chincaycuchinayasharkaña. Jesusrí
puñucushallarkapuni.



Jesustaj paycunaman c'amerka: —¿Imaraycutaj
manchariskas chujchushanquichejri? ¡Ancha pisita
Diospi jap'icunquichej! —nispa. Chanta payka
jataricuspa wayrata kochatawan c'amerka.
Chay quiquinpacha wayrapis
yacupis payta casuspa c'achata
thañicaporkancu.
Paywan rejacunataj
maytapuni t'ucuspa
ninacusharkancu:

—¿Ima runataj payri?
¡Wayrapis kochapis
payta casuncu!



Dioska tucuy runasta maytapuni
munacorka. Chayraycumin c'ata
Wawanta korka. Cay pachaman
payta cachamorka paypi tucuy
jap'icojka ama wiñaypaj
wañupunanpaj astawanrí
wiñay causayniyoj
cananpaj.



Romanos 3:23

Tucuymin juchallicorkancu. Diospa c'acha munayninmanta carunchacuspataj ni pi paymanjina causanchu. Nitaj pipis chekan cayta taripanchu.

Romanos 6:23

Runaka juchamanta pagotajinamin wiñay wañuyta jap'enka. Diosrí c'acha munacuywan Señorninchej Cristo Jesusnejta wiñay causayta kowanchej.

Hebreos 9:27

Runaka uj cutillata wañun. Chaymantataj ruwaskasninmanta Diospa ñaupakenpi cutichinan tiyan.



Efesios 2:8,9

Chay c'acha yanapayninnejtamin wañuymanta cacharichiskas carkanquichej Diospi jap'icuspa. Cayrí mana kancunamantachu carka. Diosmin mosoj causaytaka kosorkachej. Manataj ruwaskasmantachu carka ama ni pi jatunchacunanj.

Romanos 10:9,10

Runaspa ñaupakencupichus Jesuska Señorniyqui caskanta willanqui, sonkoyquiwantajchus creenqui Dios wañuymanta causarichimuska chayka, pay cacharichisonka. Runaka Diospi sonkonwan jap'icun chekanchaska cananpaj; Jesuska Señornin caskantataj siminwan willacun juchamanta cachariska cananpaj.



San Juan 3:16,17

Dioska tucuy runasta maytapuni munacorka.
Chayraycumin c'ata Wawanta korka. Cay pachaman payta
cachamorka paypi tucuy jap'icojka ama wiñaypaj
wañupunanjapaj astawanrí wiñay causayniyoj cananpaj.
Diosrí mana cay pacha runasta juchachananpajchu
Wawanta cachamorka, manachayrí cay pacha runas
paynejta juchamanta cachariskas canancupaj.

1 Juan 5:11-13

Dios willan wiñay causayta kowaskanchejta paypi
jap'icojcunaman. Cay causaytaj Wawan Jesucristomanta
jamun. Diospa Wawanwan ujchaska cajka wiñay
causayniyojmin. Diospa Wawanwan mana ujchaska cajrí
manallataj wiñay causayniyojchu. Kancuna, Diospa Wawan
Cristopi jap'icojcunaman cayta kelkamuyquichej. Munani
chekatapuni yachanayquichejta cunan wiñay
causayniyojña caskayquichejta.



San Mateo 8-9; San Marcos 1-2, 4;
San Lucas 4, 8; San Juan 2

Storyline by: Edward D. Hughes

Illustrated by: Byron Unger, Lazarus,
and Alastair Paterson

Adapted by: E. Frischbutter, Sarah S.

Quechua, South Bolivian NT (quh) © 2011, Wycliffe
Bible Translators, Inc. All rights reserved.

<https://live.bible.is/bible/QUHQUE/Mat/1>

©2025 Bible for Children, Inc.

www.M1914.org

www.bibleforchildren.org

